



KEMENTERIAN SUMBER MANUSIA

SIARAN MEDIA

MAJLIS PERHIMPUNAN HARI KESATUAN SEKERJA PERINGKAT NEGERI SABAH TAHUN 2025

1. Manifestasi kesungguhan Kerajaan dalam memperkasa gerakan pekerja dan memelihara keharmonian hubungan industri, Kementerian Sumber Manusia (KESUMA) melalui Jabatan Hal Ehwal Kesatuan Sekerja Malaysia (JHEKS) terus komited memupuk solidariti pekerja dan kesatuan sekerja di seluruh negara, khususnya di Sabah.
2. Dengan **94 buah kesatuan sekerja berdaftar di Sabah** daripada keseluruhan **782 buah kesatuan** di Malaysia, dengan kekuatan **58,402 ahli kesatuan** daripada **1,045,991 ahli kesatuan** secara keseluruhan usaha memperkukuh suara pekerja, mempertingkatkan kebajikan dan mempererat kerjasama antara pekerja dan majikan dilihat sebagai pemangkin kepada kemajuan ekonomi negeri dan kesejahteraan nasional secara menyeluruh.
3. Sempena sambutan Hari Kesatuan Sekerja, Jabatan Hal Ehwal Kesatuan Sekerja Malaysia (JHEKS) dengan sokongan Kementerian Sumber Manusia (KESUMA) dan Kerajaan Negeri Sabah telah berjaya menganjurkan Perhimpunan Hari Kesatuan Sekerja Peringkat Negeri Sabah Tahun 2025, bertemakan **“Solidariti Pekerja Pemangkin Kemajuan”**.

4. Majlis ini telah berlangsung di **International Technology & Commercial Center (ITCC)** dan dirasmikan oleh **YAB Datuk Seri Panglima Haji Hajiji bin Haji Noor**, Ketua Menteri Sabah. Ia menghimpunkan **lebih 2,000 peserta** yang terdiri daripada pemimpin dan ahli kesatuan sekerja, wakil agensi kerajaan dan pemegang taruh industri dari seluruh negeri.
5. Penganjuran ini merupakan julung kalinya diadakan di Negeri Sabah, dan menjadi simbol kepada penyatuan suara pekerja Sabah yang semakin matang dan berdaya saing dalam menghadapi landskap perburuhan yang semakin mencabar.
6. Dalam konteks nasional, reformasi perburuhan yang telah digerakkan oleh KESUMA melalui pindaan lapan akta penting termasuk Akta Keselamatan dan Kesihatan Pekerjaan 1994, Akta Kesatuan Sekerja 1959, dan Rang Undang-Undang Pekerja GIG yang sedang digubal. Reformasi ini menunjukkan komitmen Kerajaan Persekutuan dalam memastikan hak pekerja terus terpelihara dan setaraf di seluruh negara tanpa mengira wilayah.
7. Antara objektif utama perhimpunan ini ialah, mewujudkan ruang dialog antara kerajaan, kesatuan dan majikan, menyemarakkan semangat perpaduan dan solidariti pekerja, meningkatkan kesedaran berkenaan hak serta perlindungan sosial pekerja dan seterusnya memperkasa kesatuan agar terus relevan dalam dasar buruh semasa.
8. Sehingga kini, lebih 342 Perjanjian Kolektif (CA) telah dimeterai sejak tahun 2024, termasuk perjanjian penting antara AMESU dan enam syarikat perladangan utama, memberikan manfaat kepada lebih 5,000 ahli kesatuan. Peluncuran Kad Pekerja MADANI oleh YAB Perdana Menteri pada 1 Mei yang lalu kini telah dijayakan oleh lebih 100 syarikat

di Sabah, sebagai medium penyampaian faedah bersasar dan rangsangan keahlian kesatuan.

9. Pada 13 Mei 2025, satu langkah bersejarah telah dilakar melalui penubuhan rasmi Majlis Penasihat Buruh Sabah (Sabah Labour Advisory Council – SLAC) sebagai platform strategik tripartit antara kerajaan, majikan dan pekerja dalam menambah baik dasar perburuhan yang lebih progresif dan sesuai dengan landskap perindustrian Sabah selari dengan aspirasi Sabah Maju Jaya.
10. Sebagai kesinambungan daripada kejayaan program peringkat negeri ini, Kementerian Sumber Manusia turut memaklumkan bahawa Perhimpunan Kesatuan Sekerja Peringkat Kebangsaan akan diadakan pada 6 September 2025 di Pulau Pinang.
11. Perhimpunan ini turut menggariskan komitmen Kementerian Sumber Manusia (KESUMA) dalam memperkukuh institusi kesatuan sekerja melalui pendekatan berstruktur, progresif dan berpaksikan nilai Malaysia Madani. JHEKS akan terus melaksanakan inisiatif yang memperkukuh kepimpinan kesatuan di peringkat negeri, menyokong pendidikan buruh, dan membina jaringan solidariti nasional demi memastikan pekerja terus menjadi pemangkin kepada pembangunan ekonomi dan kemajuan negara.

KEMENTERIAN SUMBER MANUSIA (KESUMA)
04 OGOS 2025

LAMPIRAN**LATAR BELAKANG KESUMA**

Kementerian Sumber Manusia atau singkatannya KESUMA adalah kementerian yang bertanggungjawab kepada pembangunan kemahiran, pekerjaan, keselamatan dan kesihatan pekerjaan, kesatuan sekerja, perhubungan perusahaan, maklumat dan analisis pasaran buruh dan keselamatan sosial.

PERANAN & TANGGUNGJAWAB KESUMA

Membangunkan dan melahirkan modal insan yang kompeten, produktif, responsif dan berdaya tahan dalam pasaran buruh negara ke arah meningkatkan produktiviti negara. Memastikan kelancaran operasi pasaran buruh negara. Meningkatkan kebolehpekerjaan dan penggajian tenaga kerja tempatan bagi memenuhi keperluan pasaran kerja negara. Memastikan perhubungan perusahaan yang harmoni dan kondusif. Mengutamakan aspek keselamatan dan kesihatan pekerjaan. Memastikan jaringan keselamatan sosial yang komprehensif, dinamik dan progresif.

JABATAN DAN AGENSI DI BAWAH KESUMA

JABATAN	AGENSI
Jabatan Tenaga Manusia (JTM)	Pertubuhan Keselamatan Sosial (PERKESO)
Mahkamah Perusahaan Malaysia (MPM)	Institut Keselamatan Dan Kesihatan Pekerjaan Negara (NIOSH)
Jabatan Pembangunan Kemahiran (JPK)	Human Resources Development Corporation (HRDC)
Jabatan Keselamatan dan Kesihatan Pekerjaan (JKKP)	Talent Corporation Malaysia Berhad (TALENTCORP)
Jabatan Tenaga Kerja Semenanjung Malaysia (JTKSM)	Perbadanan Tabung Pembangunan Kemahiran (PTPK)
Jabatan Perhubungan Perusahaan Malaysia (JPPM)	
Jabatan Hal Ehwal Kesatuan Sekerja (JHEKS)	
Jabatan Tenaga Kerja Sabah	
Jabatan Tenaga Kerja Sarawak	